

"A Sacralización d'as Fiestas"

A ENRESTIDA :: 16/08/2006

A Sacralización d'as Fiestas

Ye berano, y como todas as añadas ye la puenda an que más fiestas y zelebraziions se i chuntan. Más que más en os países mediterraneos y con un orache que faiga onra ta l'acullida de chen en as carreras. Muitos dicen qu'ixo nomás pasa en l'Estau español, que ye uno d'os rasgos d'una cultura unica "typical spanish"; pero de seguras que qui dicen ixo no s'abran paseyau por as fiestas d'a Toscana italiana, Sardinia, Grezia u Croazia. Y cuan nusotros somos en a puenda ibernal a chen d'os países de l'emisferio Sur como Brasil, Uruguay u Archentina tamién se encargan de contrimostrar-lo.

A custión ye que malas que plega a Primavera, y más que más o berano, os nuestros lugares y ziudaz se plenán de fiestas y zelebraziions. Encara que ta una mayoría de chen laica istas fiestas ya no representan garra adoración u veneración a garra santo u birchén, a reyalidat ye que todas istas portan un nombre que fa referencia a la vida relichiosa. Fa bellas semanas beyemos como en o internacional pregón d'os "San Fermín" Xabier Eskubik conzellal d'Aralar en Iruña gosaba esclamar un ¡Biba as fiestas de San Fermín! y no pas o serbil chilo de "Biba San Fermín", un ombre que dengún d'os astí presens nunca no eban conoxiu y mesmo se desconoce d'a suya existencia beridica.

Exemplos en tenemos ambute en tot Aragón, y cuan plega o mes d'Agosto toz os nuestros lugares tienen bel Santo t'adorar plegando a la fuga d'o 15 d'Agosto cuan amanixen as birchens por toz os costaus.

Eszepziions bi'n ha dentro d'Aragón, podendo-se prener como exemplo ta la conmemoración de futuras fiestas. Ferias y fiestas que remeran cuan antismás se chuntaban en a benda de ganau u mastos, lugares como Biescas, Boltaña u Borja remeran ixas ferias que a la fin s'han tornau en as fiestas grans d'o lugar..

Prou que istas fiestas no son fixadas en calendatas aleatorias, a llesia cuan prenzipió a cristianizar Europa en os tiempos d'os romanos se encargaría de fixar as calendatas d'adoración cuan más y millor acullida tenesen entre a población. De toz ye sabiu que o Nadal no prenzipió a zelebrar-se con a cristianización y dinantes a chen de toda la Tierra ya zelebraba o solstizio d'Ibierno, asinas como o solstizio de Berano que a llesia s'encargaría de transformar en o diya de "San Chuan". No solo que ixo, sino que a sacralización de ritos como palotiaus i ha estau perén, por no charrar d'a "españolización" de ritos relichiosos en romerías y prozesions, imno d'España incluyiu. Exemplos en i hai ambute y muitos d'os lugares d'Aragón que han bisto como baxaba o suyo zenso d'abitadors han cambeau as calendatas d'as suyas fiestas enta o berano. Por lo tanto a fin d'a fiesta ya no abría d'estar relichiosa sino ludica y soziabilizadera. Y todas as autibidaz que se i fesen abrían d'estar culturals.

Cuan ya fa más de diez añadas as asoziacions culturals y coleutibos d'o bico d'a Madalena

se planteyón organizar as fiestas d'o suyo bico toz coinzidiban en que no eban d'estar con una fin relichiosa, y encara que o nombre d'o bico en ye, remataría clamando-se como güe la conoxemos "Semana Cultural d'a Madalena".

+Info: <http://aenrestida.blogia.com> / www.aenrestida.tk

E-Mail: aenrestida@hotmail.com

*Z.S.A. A Enrestida - Callizo San Cristobal, La Madalena, Zaragoza.

https://www.lahaine.org/est_espanol.php/a_sacralizazion_daas_fiestas